

RUMAH PUTIH

Pejabat Setiausaha Akhbar

UNTUK SIARAN SEGERA

12 April 2010

**Pertemuan Dua Hala Presiden A.S. Barack Obama dengan
Perdana Menteri Malaysia Najib Abdul Razak Mohammed**

Presiden Obama bertemu dengan Perdana Menteri Malaysia Najib hari ini untuk membincangkan isu-isu kepentingan bersama termasuk pengawalan penularan nuklear, perdagangan dan pelaburan, hak asasi manusia, Afghanistan, dan Iran. Ekonomi Malaysia yang berkembang pesat, demokrasi, dan kesediaan untuk bekerjasama dalam isu-isu penting keselamatan dan pelbagai isu menjadi asas kepada kerjasama dua hala yang kukuh dengan Amerika Syarikat. Kerjasama ini selari dengan, dan adalah komponen kritikal dalam hasrat Pentadbiran Obama untuk mengukuhkan hubungan yang sudah terjalin lama dengan Asia Tenggara dan Persatuan Negara-negara Asia Tenggara (ASEAN).

Presiden mengucapkan tahniah kepada Perdana Menteri Najib dengan kelulusan terkini Rang Undang-undang Perdagangan Strategik yang mengukuhkan kemampuan pihak berkuasa Malaysia untuk mengambil tindakan terhadap individu dan entiti yang terlibat secara haram dalam perdagangan senjata. Perdana Menteri berkongsi kebimbangan A.S. tentang kesan ketidakstabilan yang wujud disebabkan oleh penularan senjata pemusnah besar-besaran dan mengalu-alukan kepimpinan A.S. dan usaha yang dilakukan dalam menangani isu ini. Presiden dan Perdana Menteri juga bersetuju untuk bekerjasama bagi mengukuhkan lagi Perjanjian Pengawalan Penularan Nuklear (NPT) dan bersama menjayakan Persidangan Penilaian NPT bulan depan.

Perdana Menteri bercakap mengenai Model Ekonomi Baru Malaysia dan kedua pemimpin bersetuju akan kepentingan bersama dalam mempereratkan hubungan ekonomi dua hala dan menyokong integrasi ekonomi serantau yang lebih luas. Malaysia ketika ini merupakan rakan dagang ke-18 terbesar Amerika Syarikat dengan perdagangan barang dua hala berjumlah sekitar \$34 bilion pada tahun 2009. Kedua-dua pemimpin juga bersetuju memperluaskan kerjasama kedua-dua negara dalam bidang keusahawanan, teknologi, dan pendidikan.

Kedua-dua pemimpin berkongsi visi untuk Afghanistan yang lebih stabil, aman, demokratik, dan makmur. Perdana Menteri Najib memberitahu Presiden Obama bahawa atas permintaan Kerajaan Afghanistan, Malaysia baru-baru ini menghantar satu pasukan untuk menilai langkah yang boleh diambil

oleh Malaysia untuk pembangunan semula Afghanistan. Selain latihan kepada guru-guru dan pegawai-pegawai awam Afghanistan yang sedang dibuat oleh Malaysia, Perdana Menteri Malaysia menyatakan kesediaan untuk mempertimbangkan peningkatan bekerjasama dengan Afghanistan melalui latihan kepada anggota-anggota polis, tentera dan pentadbir awam.

Presiden dan Perdana Menteri bersetuju Iran perlu mematuhi kewajibannya di bawah rejim pengawalan penularan nuklear antarabangsa. Kedua-dua pemimpin juga bersetuju mengenai perlunya masyarakat antarabangsa menghantar isyarat yang jelas kepada Iran bahawa walaupun ia mempunyai hak untuk mengembangkan penggunaan tenaga nuklear secara aman, Iran tidak sepatutnya menggunakan hak ini untuk mengembangkan kemampuan senjata nuklear sebagaimana dinyatakan di dalam resolusi Majlis Keselamatan PBB dan IAEA.

Perdana Menteri Najib memberitahu Presiden Obama bahawa usaha-usaha ketara yang telah dilakukan oleh Malaysia untuk membanteras pemerdagangan manusia, dan mengambil tindakan yang wajar dalam membanteras jenayah keji ini.

Perdana Menteri Najib menyatakan sokongannya terhadap aspirasi Presiden Obama untuk permulaan baru di antara Amerika Syarikat dan umat Islam di seluruh dunia, sebagaimana yang digambarkan dalam ucapannya di Kaherah pada bulan Jun 2009, dan menawarkan bantuan Malaysia untuk bekerjasama dengan Amerika Syarikat mendekati dunia Islam.

Kedua-dua pemimpin bersetuju bahawa kesan positif keamanan dan kestabilan rantau serta kemakmuran kedua-dua negara memerlukan usaha berterusan untuk memperkuuh dan meningkatkan kerjasama di antara Amerika Syarikat dan Malaysia.